

聶亦峯先生爲宰公牘

重刊略例

一茲輯以公之服官先後爲序。其不知年月者則按事實之先後。而事實亦有公私大小之殊。皆以要政列前而以私人訴訟批判列後。間有非公牘者亦以有關經濟仍附原卷之中。

一趙莫兩姓案卷獨多。雖加刪汰。仍屬不少。其結案讞語則仍以殿於岡州再牘。俾讀者知公再任新會時此案始結。蓋非公莫能結也。

一讀公自序知公牘之刻始自新會莫姓。非公有意著述。故於體例不完。未足以盡公之文。但可作政書讀而不得以文集目之也。自序謂濂江岡州梅關三牘皆不過什一之存。先君子重刊時始續增岡州再牘高涼公牘於後。茲輯又僅選其關於政教倫常學術經濟之精華大者以視原所謂什一之存。又不過半中之半。其無關宏旨者不錄。特以爲斯世之救急針砭迷津寶筏。固無取乎多也。後之爲宰者觀此。已足爲親民之楷模矣。

一以前兩次鋟板均已散失不完。方今時局變幻。保存尤爲不易。茲第用聚珍鉛印以期事之易舉。庶免擱置淡忘。後更無從着手。所冀後之人能踵而傳之。斯較鋟板爲尤善矣。

民國二十三年十一月

孫男其杰謹識

自二十三年重刊後。於今又將十載。中更巨變。又復無存。竊念祖德前徽。光耀不墜。允宜再加翻印。以廣其傳。爰於校訂後重識數語。

民國三十二年十月

其杰再識

自叙

爲宰公贈

自叙

二

爾康備員東粵。八載於茲。顧念時事方殷。瘡痍未復。撫循匪易。擘畫維勞。自愧菲微。謬膺寵錮。重以性情愚直。才識迂疏。惟恐上負國恩。下孤民望。玷清芬於祖父。貽惡習於子孫。首唯靡潔自持。時以公忠自勵。凡於地方諸務。無不殫竭血誠。舉所爲保惠斯民。以求盡乎教養之責者。恒惴惴焉弗敢安。蓋以一邑之大。萬姓之多。政務之繁。吏胥僕從之狡且冗。其環伺左右。而嘗試乎吾膝蔽乎吾者。何可勝道。斯即虛心聽斷。實力講求。清夜自思。神天可質。而信心之處。即係歡心之處。暗中過失。負疚良多。矧其爲條教號令之徵。文字言語之末。尙何斯之能信。竟以登諸梨棗耶。緣新會有趙莫兩姓。互爭價畝一案。轆轤已百餘年。卒致懷斃多命。上臺於爾康廣任時。飭令細心勘訊。當經廉得其實。躬座大堂。秉公剖斷。指出案中罅漏。並爲揭破隱微。一時觀政諸人。不禁歡聲雷動。趙姓始惶駭汗服。莫姓亦感激涕零。兩造輸誠。似無遁飾。因未奉訊命案。不敢妄斷是非。雖將田畝情形。據實詳細稟覆。重蒙各憲獎飾有加。維時前中丞著駐節韶陽。詢取案中情弊。因即其顯而易見者。摘出六十餘條。繼隨電覆。莫姓因案未訊結。不知了期。遂將摘出各條。刊成一帙。頗曰岡州案論。以爲左券之操。爾康見之。此即力爲斥禁。良以案猶未結。何可遽作定評。且僅刊刻各條。又無後先諸稟。令人莫知原委。轉覺有目無綱。特令傳諭莫生。無許擅行刊送。乃莫生刻成此本。早經分送與人。復又覓得履勘稟詳諸稿。增列簡端。而拉雜繁蕪。款式亦多不合。幕客謂爾康曰。此刻已成。勢難中止。曷若略爲刪訂。以免貽識者羞。爰爲酌其去取。正其舛訛。易其名曰岡州公牘。而前乎岡州者爲濂江。後乎岡州者爲梅關。因亦各有公牘之梓焉。然此皆什一之存耳。綜計數載以來。事皆手訂。心血亦不知嘔出幾許。祇以風靡潦草。鄙俗自嫌。信手亂塗。即亦隨手散失。曷敢視同敝帚。稍存問世之心。茲既刊刻成編。亦復無庸終閤。容俟再爲蒐輯。續付手民。想大雅見之。當亦憫其愚而笑其拙也已。時在同治二年十月上浣亦峯聶爾康謹識於珠江寓館

馬叙

古人之文章。即經濟也。尙書載堯以來。尙矣。兩漢而後。制誥詔令之詞。奏議箋疏之作。凡關體要。悉足楷模。如朱子社倉遺規。王文成南嶺告諭。流傳至今。咸以爲法。近時陳文恭胡文忠遺集。類多經世名言。卽其手札。且有爲輯要刊布公諸同好者。此常其論事直書時。何嘗有意爲文哉。而文之大者實在於是。

衡山聶公亦峯。以世家子能文章。與恩溥同年通籍。並入詞林。後乃出宰嶺南。論者以不得盡其能事爲憾。今秋恩溥典試南來。亦峯適監內簾事。相見甚歡。暇中出其煎茶閒錄相示。稔知亦峯凡三領州邑。所至皆有聲。閒錄不足以盡之。繼乃得其岡州濂江梅關公牘三冊讀之。然後歎亦峯之文。不盡於是。必如是始足以見亦峯也。夫居官而奉行故事者。歎也。任事而條理不具者。疏也。言事而端委不詳者。陋也。今觀三牘。其稟承於上之文。則據實陳言。不激不隨。務得盡其意而後已。其明諭於下之文。則準情酌理。或予或否。悉各如其意而後已。古之爲神君。爲衆母。何以加焉。蓋本乎任事之心。劑以解事之識。復出以善論事之筆。而其爲文也。遂高乎風雲月露之章。花鳥蟲魚之註。則謂三牘爲經濟可也。爲文章可也。由三牘而廓之。卽謂爲亦峯經濟文章之嚆矢。亦可也。恩溥不能文。然好當世之文。尤好經世之文。而三牘之文如是。能弗爲之傾倒也哉。爰拜手而爲之序。

同治六年季秋典試使者大理馬恩溥撰於北江舟次

濂江公牘

衡山 聶爾康 亦峯

按此係公在石城縣任內之公牘

到任示 咸豐七年十一月十八日

爲曉諭事。照得本縣權豪斯土。唯求有益於民。而斷不敢以怠忽苟且之爲爲之也。凡於地方公事。有利當興。有弊當去。有冤當理。有廢當修者。但使見聞所及。無不實力舉行。向聞此間俗尚頗醞。民知畏法。大抵勤儉自守。好義急公。守望相資。實堪嘉尚。唯間有險健之徒。慣行陵訕。以至小民被其愚弄。受累無窮。業經本縣嚴飭代書。嗣後遇有必須呈控之事。唯宜據實直陳。本縣隨到隨傳。隨審隨結。無不虛衷判斷。一秉至公。如有得受賄私。枉法殃民者。天地神明。定加誅殛。至本縣所延幕友。俱係端士正人。亦無管事官親在外招搖撞騙。唯恐吏胥僕從。防範難周。或敢狼狽爲奸。甚至指官嚇詐。准爾等紳民立時網送到官。以憑盡法懲治。然或訊無實據。亦必從嚴反坐。以儆刁誣。至於紳監秀良。實爲合邑之望。或以詩文相質。或以守衛相商。或以閭閻疾苦相聞。或以政治得失相勗。本縣無不隨時接見。敬禮有加。却不得稍涉己私。妄干公事。他如農工商賈。以及負販細民。但使本業各安。無不愛之如子。其有奸胥蠹役。土棍訟師。以及竊盜匪徒。凡爲不法者。苟能悔悟自新。概予寬其既往。倘敢以身試法。怙惡不悛。除出示招告外。定當密訪嚴拏。搜除務盡。斷不使稍留餘孽。貽害我民。蓋除莠乃可以安良。而警一即可以戒百也。本縣世受國恩。職司民牧。盟心似水。執法如山。茲於下車之初。不惜諄諄誠諭。爾紳民人等亦宜曲體苦心。互相勸勉。羣共趨於良善。毋更蹈於愆尤。則風俗益醞。人心益正。以永享夫恬熙雍睦之庥。是則職斯土者之所厚幸也夫。懷之。特示。

息訟示

爲 寧 公 牘 濠 江 公 牘

二

照得爲政之道。首在安民。而安民之端。莫先息訟。粵東向多健訟之徒。且有圖告不圖審之說。不知非民之好訟也。有唆之訟者也。非民之不圖審也。有阻之使不得審者也。蓋訟棍之所以唆訟者。原欲魚肉斯民也。若一令赴審。便當結案。彼即無從而魚肉之矣。於是多方恐嚇。百計阻撓。架砌虛詞。隨時變幻。經年累月。迭控不休。甚至兩造蕩產傾家。俱欲罷手。而訟棍猶損唆不已。以逞其刀筆之能。噫嘻。此愚民之所爲愚也。故欲息訟。必先除訟棍。業經本縣出示招告。並嚴密訪拏。盡法懲治。以除民害。爾紳民人等亦宜各安本分。恪守天良。勿近奸邪。勿爲非僻。勿欺懦弱。勿占便宜。縱使橫逆之來。不妨再三忍受。古人云。忍得一時之氣。免得一世之憂。此言深有至理。蓋人間欺我。人斷不能欺天。天道無私。報應不爽。迨至欺我者身受其報。而我之甘受人欺者。既享和平之福。且博忠厚之名。以視夫狀入公門。票傳私室。匍匐階下。拘繫獄中。產破家亡。禍猶不止者。其苦樂爲何如耶。嗣後除有萬難刻緩之事。准其隨時稟控外。其餘一切尋常控案。仍當案期呈遞。不得擅自鳴冤。蓋如此相爭。不過一時之忿。稍遲時日。氣已漸平。或經族戚解和。或被鄉鄰勸阻。前嫌頓釋。後患俱消。若一到公堂。便難中止。縱使所控得直。而荒時廢業。所失已多。事後追維。能無悔恨。何況毒流鄉里。累及身家。仇結子孫。怨連戚族。訟之爲害。何可勝言。此凡事不務強忍之爲愈也。如實不能忍者。亦當於三八放告日期。本人親至代書處訴說實情。令其據實書寫。不得聽信挑唆。妄行架砌。其有自作詞稿者。亦必本人親到。方准蓋戳。并着取具歇保。聽候傳訊。至於紳衿婦女。應用抱告者。亦須隨傳隨到。以便早爲訊結。如傳訊不到。即將歇保責革。并將呈詞撤銷。不准再告。至婦女之有父有翁有夫有子孫者均着夫男出名。不得任其妄控。除嚴飭代書敬謹遵照外。合行出示曉諭。爲此示仰紳民人等知悉。自示之後。務宜曲體本縣訓諭苦心。展轉詰誡。要使家諭戶曉。以期訟簡刑清。則親睦之風。可計日俟矣。懷之。特諭。

嚴拏訟棍示

爲出示招告以除民害事。照得明刑爲弼教之資。除莠乃安良之要。本縣權篆斯土。唯求利濟羣生。斷不容兇惡匪徒。留爲民害。爲此示仰軍民人等知悉。如有訟棍土豪奸胥蠹役。以及積匪猾賊凡爲不法者。苟能悔悟自新。概予寬其既往。倘敢以身試法。怙惡不悛。除一面嚴密訪拏外。准爾紳民人等指名控告。以憑盡法懲治。務絕根株。本縣心若冰清。情同火烈。愛民如子。嫉惡如仇。言出法隨。決不稍貸。凜之。特諭。

諭多士示

爲端士習以正人心事。照得士爲四民之首。當思所以實副乎名。其立品貴端。其立心貴厚。其立志貴高且遠。其立行貴正大而光明。蓋今日鄉里之秀良。即異日國家之碩彥也。今日躬行之事蹟。即異日觀法之師資也。朝廷之所以重士者以此。士之所以自重者亦以此。士不自重。尙得謂之士乎。石邑俗尙頗淳。民知好義。從前抱道守經之士。要皆砥礪廉隅。無如習俗移人。漸趨澆僞。其愚而好事者無論矣。即間有才質可造者。輒復狂妄自矜。嬉遊自廢。但博一衿到手。便如位極人臣。不思恪守臥碑。勤脩舉業。更圖上進。力爭上流。而斤斤然以武斷爲能。以把持爲力。以舞弄架陵爲慧業。以侵漁沾染爲生涯。甚或糾衆搶奪。行同劫盜。種種惡習。不可勝言。而安舖地方爲尤甚。即如廩生馬口等。向亦頗知自愛。近乃甘爲敗類。竟有去年糾搶客商數百金之事。經前任移學拘傳。至今尙未結案。又如武生戚口現有控其統衆兇搶之事。亦經傳訊在案。至於楊口等。則更不知道理爲何物。恃其附入武庠。竟敢夜郎自大。無論何項公事。動輒聯名數十。任意妄呈。并以異地監生。冒名入稟。及至飭傳質問。又皆畏匿不前。且聞其屢次入城。干與公事。時竟以合墟捐題經費。作爲若輩火食夫價之資。並敢於書院育才重地。作爲若輩議事聚訟之所。此等惡習。究竟開自何時。若不及早懲除。實爲世道人心之害。蓋人心不正。皆由於士習不端。愚賤效尤。勢將胡底。倘異日變本加厲。必將有追咎於

本縣之姑息養奸者矣。豈職司風化者。而顧忍坐視我民之被其濡染而不爲預遏其流耶。第念冒昧聯名。不無誣捏。若引生員好訟多事之例。概行斥革。未免株累太多。當擇其劣蹟之最著者。略懲一二以儆其餘。倘能悔悟自新。悉予寬其既往。如敢怙終不改。定當按律嚴懲。爲此示仰閭邑生監等知悉。自示之後。其各體苦心。痛加改悔。一洗從前惡習。以期力挽頹風。則士習以端。而人心自正。將見和平日積。仁讓風行。上之可爲國家有用之才。下之亦不失爲鄉里有道之士。其有裨於世道人心者。豈淺鮮哉。懷之。特諭。

再行嚴禁試場諸弊示

爲再行嚴禁試場諸弊事。照得讀書首宜立品。求慊必先戒欺。從未有行險徼倖之小人。而能有所成就者也。國家以制藝取士。原欲拔取真材。以爲異日棟梁之選。而其要則端自童子試始。蓋異日之掇巍科躋顯秩。潤色鴻業。職掌文衡。以至宅揆封圻。銘鍾勒鼎。何莫非此童試之人爲之耶。於此而不自愛。則本根已失。遑問其他。縱令徼倖有成。適足貽羞士類。他日出身行政。亦不過小人之尤耳。尙安望其不負吾君不負吾學不負吾心耶。粵中風尙夙隆。人知勵品。從前鴻儒碩彥。理學名臣。代不乏人。後先照耀。乃近日世風一變。竟多以賄相高。或買案元。或買前列。或買完場。奇貨可居。明買明賣。通行大市。大抵如斯矣。顧念石邑學額。祇得八名。除縣府兩案首外。僅餘六名。而此六名者。或係前列。或係完場。又皆有鎗替傳遞以售其奸。雖有聖神。其何能察。嗟我寒士。窮年屹屹。事畜都拋。而欲於此時出其技。以與錢神爭勝。其能濟乎。此所以不必讀書。唯須牟利也。蓋在富者取攜甚便。早已打定主意。不過花費幾個臭錢。便可唯其所欲。何用更爲迂苦。必須親自讀書。即在貧者。亦知力難與較。然與其讀書不能制勝。不若改而營利。以爲應試時賄取案首前列以及雇倩鎗替傳遞之資。較之攻苦讀書。似覺稍有把握。何況入學以後。便有祖業分肥。小往大來。有何不可。以致富者日益驕橫。罔知禮義。貧者日趨卑鄙。妄肆鑽營。無怪乎文教失傳。天良盡泯。江河日下。究

將何所底止耶。本縣洞察情弊。怒焉隱憂。因於示期考試時。詳晰出示曉諭。又恐該文章等。以從前歷任亦皆張貼告示。後仍間或出售。遂以本縣此諭。亦係奉行故事。掩耳盜鈴。特又明白曉諭。並爲盟誓以要。如有鬻賣案首。以及賄取前列者。天誅地滅。永絕子孫。蓋欲爾等之深信不疑。免爲奸徒撞騙。庶使真才實學。得以各盡所長。不致令寒士含冤。末由發跡也。爾等如果有志向上。一見本縣此諭。當必洗心滌慮。各奏爾能。以無負本縣一片培植人材之至意。乃竟不知自愛。仍以詭遇爲心。邀請庸劣秀才。肆行鎗替。編取暗號。十百爲羣。拋遞鎗頭。轉爲分致。此等下流氣習。實屬有玷斯文。業經本縣訪聞。查出二十餘號。本欲按名根究。因見人數太衆。不忍過事株求。只得格外姑容。概行記卷不閱。昨已當堂誠諭。務宜痛改前非。切勿再犯場規。求榮反辱。詎意下愚成性。怙惡不悛。舞弊行私。依然如昨。且以本縣巡查嚴密。無計可施。竟敢賄通本縣家人。代爲傳遞。當經本縣覺察。究出實情。業將首先應允之家人胡昌一名。責押羈所。聽候嚴辦。其餘知情不首之家人陳太等。概行逐出。以儆奸邪。所有爾等生童賄通之處。自應一律治罪。方足以昭平允。然本縣恩不嫌過。待士尤慈。即至萬無可寬。猶復曲爲容隱。且看爾等下次是何光景。再行定奪。如能幡然改悔。便可不復深求。若再自外生成。即亦無嫌過刻。本縣如衡如水。如石如鏡。凡於汝等各卷。無不細加校閱。即或萬分不通之作。悉皆耐苦看完。但有一句稍通。亦必特爲圈出。無論各牌名次。逐爲再四推求。即取列榜末之文。亦無不細校微茫。分別上下。本縣如此相待。而汝等竟不知感。且忍自欺。則是汝等別有肺腸。又何必苦心苦口。至再至三。諄諄誥誡爲耶。然此亦皆甘於暴棄者之所爲。而非所論於廉隅自勵者也。若現在所取前列。以及前二百名。率皆面試多場。俱皆蔚然彪炳。綽有可觀。兩宜努力前修。勉圖上進。後來發越。正未有涯。至若不知自愛之徒。則自有朝廷之法在。榮辱禍福唯其自擇焉耳。懍之。特示。

嚴禁遊神演戲聚賭招娼示

爲宰公牘

濠江公牘

爲嚴禁遊神演戲聚賭招娼以肅地方以維風化事。照得禮隆報賽。原民志所樂從。而俗尙嬉淫。亦王章所必禁。茲查本邑尊神靈蹟懋昭。誠求悉應。雖不列於祀典。實有造於斯民。向於二月初九等日遊城演戲。以答神庥。作據邑紳全元愷等呈請請捐。本縣以吾民託庇之神。即亦不容自己。因特捐錢五千。立付該生領訖。第聞此間陋習。不過借神爲名。到處歛錢。希圖染指。竟將神像縛置肩輿。到處巡遊。肆行狎侮。并於校場搭台演戲。晝夜不分。舉國若狂。四方雲集。且於戲台左右。連搭高棚。招集土娼。歡呼暢飲。男女混雜。靡恥淪亡。稍有人心。定知痛恨。豈福惠正神。必欲汝等如此穢褻乃爲誠敬耶。慢神虐民。莫此爲甚。傷風敗俗。更不忍言。即在常時。亦當嚴禁。況今靈山未復。廉郡戒嚴。茂名化州。頻聞風鶴。府城防堵。不敢稍踈。博白陸川。時傳警報。當此四方多事。正我官民戰兢惕厲之時。朝夕防維。猶恐未逮。尙何暇荒時廢業。爲此治遊。致令娼賭橫行。盜賊混跡。萬一有失。咎將誰歸。豈汝等只顧數日嬉遊。頓忘一邑利害耶。合行出示嚴禁。爲此示仰閭閻軍民人等知悉。屆期如有酬神還願者。准各虔備香燭供品。恭詣神祠敬謹叩謝。拜畢即各歸家。無容停滯。其無事酬神者。不得隨聲附和。逐隊遊觀。至於抬神遊城。裝燈演戲。以及一切招聚娼賭。販賣酒食等事。概行嚴切禁止。如有違抗不遵。忘思異議者。除將本人鎖拏究辦外。并將該首事等一併治罪。如謂錢已斂就。不便退還。准爾該首事等妥爲收存。容俟各處清平。補行演戲。却不得務爲輜褻。以瀆神威。神若有知。定當福汝。神如降罪。則本縣一人承之。斷不爲爾等累也。本縣爲爾等保護身家維持風化起見。該首事等務各及早停止。通飭恪遵。幸勿以身試法。自貽後悔也。懷之。特示。

嚴禁五罐葬親示

爲申明例禁嚴切曉諭以挽惡習而杜訟源事。照得朝廷立法。首嚴不孝之誅。人子事親。當釋無違之旨。蓋喪葬唯期乎盡禮。而墳塋尤冀其永安。此貴賤所同然。而智愚所固有者也。乃聞石邑風俗。於其祖父方死之頃。即存一將來改葬之心。

殮以薄材。瘞之污壤。故令水淹蟻蛙。以速其朽且化。而後邀同族衆。舂鍤相偕。發塚劈棺。取骸檢驗。其尚有枯筋纏絡血痕漬滯者。則以刀鏗刮剔之。以鼎鑊糜煮之。傾置盆中。混加洗滌。然後請之入甕。其甕與常製異。上下相合如缸。高廣俱不盈尺。底鑿數孔。以吸地氣。有專門業此以濟患者。美其名曰金罐。只此悶餘金罐中。舉所謂三百六十五節骨殖者。無論爲首爲足爲面爲背。羣焉顛倒錯亂於其中。而仁人孝子之心。於是乎大慰矣。遂乃邀請地師。購求吉地。選時擇日。重奠牛眠。戚友親鄰。咸相走賀。鮮不以爲發福發祥。可計日俟。迨至久無佳耗。甚或轉見衰頹。則又將此金罐再發再挖。再罐再瘞。並聞有一歲屢遷。卒至拋棄而不敢聲張者。蓋以金罐取攜甚便。費用無多。可以爲所欲爲。不若昇棺遷葬之艱於舉事也。然此猶不過惑於風水之說。罔知禮義之徒。將其祖父之枯骸。以爲子孫邀福之具耳。又有發人吉壤。詭謀侵葬。私將骸罐附他人之墓側。以分其利。迨至主家知覺。投族告官。受罰受刑。仍然斷令遷葬。未得其利而先受其害。亦何樂而爲此。然此猶不過意在吉地。成此陰謀。而非有詭詐勒索於其間也。又有奸狡之徒。或因貧困難堪。或因詛詐不遂。特挖祖墳一具。葬入他人墳山。騎頂當胸。故碍風水。勒索幫錢改葬。方肯遷回者。並有用罐盛取猪狗他骨。暗埋人墳。誣人換易者。亦有埋一空罐。誣人拋棄者。且有預埋破罐。誣人毀罐棄骸者。種種虛誣。不堪枚舉。然此猶不過捏詞詛詐。非真有毀棄換易之事也。詎意禁告之徒。因見無人守墓。竟於昏夜挖塚出骸。投諸水火。即以其祖之骸易置罐內。修築完好。主家不知。猶時時祭拜他人之祖父以祈福。而卒無一效。且歸咎於此地之無靈。又復挖出再遷。更求吉地。而此盜葬之子若孫。咸竊竊然深幸詭計之復售。而笑人之盡孝。乃曾不轉瞬。而此盜葬者之子孫。亦竟同歸絕滅。斯固禁告者之棄人祖父以便私圖。自必難逃天譴。而實亦主人之自用金罐。自毀祖骸。自貪吉壤。有以啓之也。向使有封有樹。有墓有棺。其能容盜葬者之得所藉手耶。又有盜葬之罐。被人知覺。密爲挖出其骸。遺之糞廁。或與猪狗骨同燒。而另以猪狗他骨。仍藏罐內。照舊掩埋。而此盜葬之家。見無速效。亦復再挖再葬。竟以

猪狗之骨爲其祖骸。又爲主家所竊笑而稱快者。卒之兩敗俱傷。同歸於盡。此又天理之可奮乎地理者也。他若懷仇挾恨。怨毒難伸。而暗棄其仇之祖骸。以爲報復之計者。尤不可以罄述。何莫非自用金罐之所致耶。然此猶不過陌路仇讐。傷天害理。爲此兇殘忍毒之行。而非有水源木本之親也。尤可異者。則以一脈之親。互相殘賊。同一父也。而有利某子不利某子之分。於是長忽遷諸東。仲忽遷諸西。叔與季又復遷諸南與北。而母之爲嫡爲繼爲庶者更無論矣。至若支分派衍。子姓繁多。聽信形家之言。謂此地於某房爲利。某房爲害。於是以長房之祖骸。盜葬於次房之墓側。又或以三房之金罐。竟易以四房之祖骸。而水火之投。糞廁之遺。以及猪狗骨之燒。又皆所弗計者矣。嗟乎。此金罐之害之粗可舉似者也。其中情弊。詭譎萬端。有非人情所能擬議。以故此爭彼拒。殺伐相尋。訟棍土豪。從而搆訟。禍連鄰里。仇結子孫。累月經年。傾家蕩產。而猶認繼然抱此金。以爲奇貨可居。而至死不悟。然則金罐之害可勝言哉。所以聖朝製律。備極周詳。不孝之誅。至嚴且密。而鄉愚無識。竟皆毅然爲之。毅然認之。亦若分所當爲。而略無妨碍也者。今若驟繩以法。未免陷於無知。合行恭錄律文。明白曉諭。爲此示仰闔邑軍民人等知悉。汝等如有從前已用金罐未經入土者。限於一月以內趕緊安厝。以後不得再遷。違者重究。其自出示以後。再有發掘祖父屍骸改用金罐者。即行照律治罪。其有製造金罐者。准人捉送到官。一併嚴究。茲將律例分列於後。以便一目瞭然。知所儆戒。無自罹於極典。以力挽夫頽風。庶幾化彼兇殘。釀爲和氣。是則守土者之厚望也夫。切宜凜遵毋違。特示。

勸辦團練諭

諭團練紳士等知悉。照得爲政端在安民。而安民必先禦侮。茲本縣下車伊始。首重團防。業將編查保甲一切章程。分別舉行。并曉諭各鄉練紳趕緊督辦團練。保衛鄉閭。以憑本縣逐境巡查。細加校閱。至於城廂內外。尤宜實力舉行。況聞本邑練紳辦理素稱得法。更未便稍有廢弛。除出示曉諭外。合亟諭飭。諭到。該練紳等即便遵照速將所團壯丁勤加操演。

晨昏罔懈。守望相資。器械務要整齊。聲勢亦皆聯絡。本根既固。外侮自除。保護身家。實爲良法。本縣關心民瘼。誦諭先頒。當即逐處親查。按名考覈。分別獎勵。以慰勤勞。該練紳等當必曲體苦心。益加整飭。上以儲國家干城之寄。下以爲鄉里保障之資。則閭閻安恬。昇平有象。爲政之要。莫先於此矣。慎速切速。毋違。特諭。

諭公局練紳

照得本縣前因亟籌經費以辦團防。特爲倡捐白金。專遣家人賁交該局練紳。歸入實用。乃日久未據該局申報領收字狀。及昨接見該紳。亦無一言道及。究竟該項銀兩。是否收到。著即聲明。以免家人隱匿之弊。查捐簿等項。向由該局備齊送署請印。茲皆本縣捐資製辦。分飭家人繕書。無庸另辦。至所舉各鄉督捐紳士。業經本縣分飭札諭。無論從前有無捐助。以及是否在本局辦事之人。均着該公司練紳飛速寄知。卽日來城請領印簿。以便刻期捐繳。無稍遲延。至抽釐一節。雖經前任移交詳覆。惟一切章程。以及會否奉行之處。未據稟明。應着該紳等體察情形。出具切結。以憑一體曉諭永遠遵行。每日抽釐若干。每月共計若干。均着於五日一爲彙報。其銀即交該處局紳手收。無稍漏溢。本縣并派親信家丁分投巡察。其食用等費。均經本縣發付。不得在局妄支。至辦理保甲各條。該局既經刊有舊章。應即趕緊印刷。隨同捐簿分給。以便逐處恪遵。茲並發給循環簿式。着即趕緊印刷一律同行。其鄉墟之有當孔道者。亦併發給一簿。責令局紳逐日稽查。以除奸匪。至團練一切事宜。節經出示曉諭。並着通知各鄉紳練。實力舉行。以無負本縣諄諄訓誡之至意。懍之。特諭。

西匪竄擾調兵往剿稟 咸豐八年正月二十五日卯刻

敬稟者。竊照卑縣地方。與西省博白陸川界址相連。時有匪徒出沒。職於抵任後。首先倡捐舉行保甲事宜。復諭飭各鄉紳士。認真團練壯丁。分投堵禦在案。茲於本月二十五日。據探役報稱。本月二十三日戌刻。有西匪朱亞亮七朱十九等

。由博白起事率賊二千餘人。竄入縣屬之坡禾地村。該村與博白緊相接壤。居民無多。練丁有限。致被佔據。該處與青平墟相距十三四里。見聞較早。二十四日。即經青平紳士羅揚武等。督帶練丁馳往攻擊。傷斃賊匪百餘名。斬獲首級三十二顆。現在該匪仍屯聚坡禾地村。堅匿不出等因。職聞信之餘。當即會營添撥官兵。僱募壯勇。並調集各鄉團練。前往剿辦。一面移知博白縣嚴加堵禦。截賊歸路。一面督率兵勇奮力攻剿。務期淨絕樛株。無令蔓延滋擾。以慰憲懷。除將剿辦情形隨時稟報外。合將西匪竄入縣境。及調撥兵勇練丁往剿緣由。馳稟憲台察核施行。

剿匪獲勝進攻被另股賊匪截斃練勇稟二月二日

敬稟者。竊照前月二十三日戌刻。有西匪朱亞亮七朱十九等。率賊二千餘人。竄入縣屬之坡禾地村屯聚。當經爾康會營派撥弁兵。僱募壯勇。並調集各鄉團練。前往剿捕。業於前月二十五日卯刻。將辦理情形具稟憲鑒在案。即於是日辰刻。督飭兵勇分爲三路進剿。該匪亦分三股前來抗拒。兵勇奮力攻擊。大挫賊鋒。自辰至午。鏖戰三時之久。殺斃賊匪一百餘名。奪獲器械多件。受傷者無數。該匪抵敵不住。退回巢穴。彼時兵勇獲勝。各皆爭先追剿。併力攻入賊巢。正在得手之時。不意又有另股賊匪。適從西地竄來。將我兵勇截斷。首尾不能相顧。督帶練勇之武生羅崇齡羅揚武等。奮勇當先。已入賊壘。致被該匪殺傷身死。並傷斃練勇十餘名。受傷壯勇十餘名。維時天氣將晚。惟恐兵勇飢疲。只得暫將兵勇撤回。分別撫卹醫調。仍在青平駐紮。惟連日賊匪漸來漸多。爾康一面添僱壯勇八百名。並調集各路練勇數百名。派令公局首事藍翎六品軍功頂戴候選縣丞江溫。和。隨同督帶。相機進剿。一面移營添派精兵百名。協同攻擊。務期將匪殄滅。以靖地方而紓憲廑。除俟隨後進剿得手續行稟報外。所有攻剿西匪獲勝。進攻賊巢。突被另股賊匪竄來。傷斃練勇情形。合先馳稟憲台察核施行。

請添兵會剿稟二月十一日

敬稟者。竊於本月初二日發稟後。即便督率兵勇逼近賊巢。併力攻擊。連日俱有斬獲。惟賊匪日來日衆。漸至五六千人。近復砍伐樹株。圍成木寨。因見兵勇攻剿甚急。畏匿不出。懸立重賞。鼓勵兵勇。於初八日未刻。攻破賊巢。殺斃賊匪無算。而賊首朱亞亮七等。率其黨與。俱從後路奔逃。維時天色昏暮。兼值大雨。未敢窮追。偵知該匪竄至縣屬之荒埔村。占踞該處。與合浦縣屬交界。距坡禾地村三十餘里。距青平墟亦三十餘里。爾康飛即一面移知合浦丁令。並諭飭合石公局派撥兵勇。合力夾攻。一面移營追剿。於初九日駐劄榕木村。相度地勢。設法進剿。探知該匪因該村狹隘。以一股分踞該村左近之頭炮臺嶺。竟成犄角之勢。當將兵勇亦分兩路。於初十日辰刻進兵。該匪兩股齊出。分投抗拒官軍。開砲轟擊。斃賊一百餘名。生擒賊匪二十四名。正欲乘勢剿除。忽有騎馬賊匪多人。冲入彭勇隊內。戮斃練勇三名。彭勇忽然驚潰。幸各兵勇上前力戰。賊始退回。亦即暫令收伍回營。查點各路兵勇。計殺斃官兵二名。彭勇三名。吳勇二名。受傷石勇三名。當經分別撫卹調治在案。查此股賊匪。勢已窮蹙。尙敢如此猖獗。必須厚集兵勇。方能殄滅淨盡。現已添募新安諸勇。協同攻剿。猶恐未能得手。敢求憲台賜派郡城官兵二百名。並大直壯勇數百名。星夜前來會剿。迅掃妖氛。無令蔓延滋擾。以期仰慰憲懷。除俟隨後進剿續行稟報外。所有攻破賊巢。追剿獲勝。因被馬隊賊匪冲入。彭勇驚潰。以致傷斃兵勇數名。並請添派兵勇會剿各緣由。合先馳稟憲台察核施行。

道憲批 據稟已悉。現經飛札駐紮電白直勇一百四十名。並保安福勇一百六十名。統令隊目莫善喜管帶。星夜馳赴石城。隨同剿辦。仰該令移會營員。迅即親身督帶兵勇練丁。相度機宜。刻期進剿。務將該匪全股撲滅。毋得再令蔓延。大千重咎。切切。並移檄都府知照。仍候鎮台批示繳。

連日剿匪獲勝追至西地稟 二月二十一日

敬稟者。竊爾康等於本月十一日以追剿西匪雖經獲勝。惟恐未能一鼓蕩平。稟請憲台添派郡兵直勇下縣會剿後。當即添

募潮直新安各處壯勇二千餘名。連前僱各勇。共計五千六百餘名。刻日取齊會剿。又以經費支絀。星夜馳回縣城籌辦軍餉。仍一面飛移合浦丁令。督帶兵勇。並諭飭合石練紳馬維全等齊集練勇。定期於十九日協同攻剿去後。爾康等即於十七日督帶兵勇馳赴青平墟駐札。嗣於十八十九等日奉憲調撥之直勇。並保安福勇。陸續到縣。詎該匪因聞兵勇雲集。知難抗拒。先於十七日午刻。由荒埔逃至合浦交界之白沙墟。當經合石練局丁勇擊斃賊匪多名。該匪負隅屯踞。十九日爾康等督帶兵勇。併力攻擊。殺斃僞先鋒一名。轟斃賊匪數十名。奪獲器械多件。因時將昏暮。收伍回營。二十日復率兵勇進剿。鎗炮環攻。該匪抵敵不住。且戰且退。我兵勇乘勝追殺。鎗斃執旗僞先鋒一名。擊斃賊匪多名。該匪退入巢穴。堅閉不出。只好暫行收隊。爾康等因思此股賊匪。連日被官兵擊敗。誠恐遁回西地。當經飭令兵勇嚴密堵截。四面兜圍甚密。遂爾翻山越嶺。亡命奔逃。各兵勇奮力追剿。嗣因山路險僻。樹木叢深。未敢窮追。旋據探報。該匪逃回西省之龍潭沙碑黃坭塘等處。零星四散。狼狽不堪。查該處距卑縣之青平墟。各六七十里不等。雖山路紛歧。林深菁密。未敢妄行輕進。而此等烏合之衆。難保無散而復聚情事。仍令各處兵勇於要隘駐札。嚴密堵捕。一面探明路徑。相機進剿。務期盡絕根株。不留餘孽。以紓憲廑。除將剿辦情形隨時稟報外。所有兵勇連日剿捕西匪疊獲勝仗。迨至西地緣由。合先馳稟憲台察核施行。

曉諭各首匪投誠示

爲剴切曉諭事。照得謀反叛逆。原王法所必誅。而悔罪投誠。亦天心所宜宥。我朝深仁厚澤二百餘年。爾等世受國恩。不思圖報。而乃敢於叛逆。自貽赤族之禍。究竟是何肺腑。真不可解。卽如朱十九等。亦皆良家子也。汝家之掇巍科。躋顯秩。膺厚祿而沐榮封者。亦不乏也。我國家何負於汝。而顧忍於叛逆。以自貽赤族之禍耶。揆厥由來。汝亦非有深

仇大恨。萬不得已也。不過因與姚陳諸姓械鬥啟釁。被官捉拏。汝族出賞縛送。以致如此耳。汝若早能自首。誓改前非。汝之縣主。亦豈不能有汝。而乃率其黨與亡命奔逃。竄入我石城。大肆焚擄。迨經本縣擊散。逃回故里。復欲攻城劫獄。又經汝縣主督兵剿散。無路可歸。又復合入嘯十一黨。重爲我石城之害。姦淫擄掠。慘不忍言。本縣念切民依。痛加誅剿。沿途追殺。斬獲如麻。嗟彼蠢愚。何知利害。皆爲汝朱十九招之使來。遂爾隨聲附和。以致屍橫曠野。名列叛徒。父母無依。妻孥失所。祖宗蒙穢。子孫貽羞。此無數生靈。何莫非汝朱十九置之死地耶。即朱十一等之擾害我民。又何莫非爾朱十九導之荒路耶。嗟乎。汝朱十九之罪大矣。石城博白之人。皆欲食汝之肉而寢汝之皮矣。兩縣合剿。該族嚴拏。進無可依。退無可守。汝與朱十一暨各匪首等。豈復尚有生理。本縣正好趁此誅滅淨盡。以伸國法而快人心。尚復有何顧惜。然究信汝等爲勢所迫。終屬可矜。昨獲該夥匪朱林昌。供稱汝朱十九等亦知罪大惡極。爲覆載所不容。無如欲罷不能。欲歸無路。倘能赦其萬死。予以再生。不唯悔罪投誠。並願立功自效。第恐無此仁人。開此大恩等語。本縣大公無我。何所不容。比即當堂概然允許。飭令密緝回去。招之使來。渠又恐本縣或有假心。誘來誅戮。復乞明晰曉諭。以釋羣疑。豈知本縣此心。神天共鑒。汝若肆行劫掠。殘害我民。是即吾之仇也。仇則誅之務盡。汝若痛自改悔。奮勉圖功。是猶吾之子也。子則愛之不遑。天下豈有父母斯民之人。而爲此陰謀誘殺之事耶。況汝等萬分窮蹙。進退無門。業如釜底枯魚。何難立時殄盡。而本縣不欲以汝等之故。多殺無辜。特爲法外施仁。開此三面之網。並非因汝等兇悍難制。勉強招安。又何必爲此陰謀。致爲汝等所竊笑耶。然不明晰曉諭。汝等終不能無疑懼之心。爲此示諭汝等知悉。自示之後。凡汝首夥各匪。如有真心悔罪者。立即解散歸農。善謀生理。本縣當爲移知汝之縣主。代爲請命。予以自新。如有首匪不遵。汝等捉獲來獻者。每名賞銀二百兩。六品功牌一張。捉獲兩名來獻者。除前賞外。並爲保舉千總之職。獻至三名者。格外保舉藍翎。如能再多。總從優獎。現當四方多事。正宜乘此立功。若能建立殊勳。本縣定加保